

ÁKVÖRÐUN EVRÓPUÞINGSINS OG RÁÐSINS nr. 2256/2003/EB

frá 17. nóvember 2003

um samþykkt áætlunar til margra ára (2003-2005) um eftirlit með aðgerðaáætluninni um rafræna Evrópu 2005, miðlun góðra starfsvenja og aukid net- og upplýsingaöryggi (MODINIS)

(Texti sem varðar EES)

EVROPUÞINGIÐ OG RÁÐ EVRÓPUSAMBANDSINS HAVA,

með hliðsjón af stofnsáttmála Evrópubandalagsins, einkum 3. mgr. 157. gr.,

með hliðsjón af tillögu framkvæmdastjórnarinnar ⁽¹⁾,

með hliðsjón af álitum efnahags- og félagsmálanefndar Evrópubandalaganna ⁽²⁾,

með hliðsjón af álitum svæðanefndarinnar ⁽³⁾,

í samræmi við málsmeðferðina sem sett er fram í 251. gr. sáttmálans ⁽⁴⁾,

og að teknu tilliti til eftirfarandi:

- 1) Á fundi sínum í Lissabon 23. og 24. mars 2000 setti leiðtoga ráðið það markmið að gera Evrópusambandið að samkeppnishæfasta og öflugasta þekkingarhagkerfi í heimi og lýsti því yfir að þörf væri á opinni samræmingaraðferð til að mæla framþróunina.
- 2) Á fundi sínum í Feira 19. og 20. júní 2000 samþykkti leiðtoga ráðið aðgerðaáætlunina um rafræna Evrópu 2002 og lagði sérstaka áherslu á nauðsyn þess að móta langtímasýn fyrir þekkingarhagkerfið og stuðla að því að allir borgarar fengju aðgang að nýrri tækni og á fundi ráðsins (innri markaðurinn) 30. nóvember 2000 var lögð fram skrá með 23 vísnum til að mæla framþróun aðgerðaáætlunarinnar um rafræna Evrópu 2002.
- 3) Framkvæmdastjórnin birti 28. maí 2002 orðsendingu til Evrópuþingsins, ráðsins, efnahags- og félagsmálanefndar Evrópu og svæðanefndarinnar og ber hún yfirskriftina: „Rafræn Evrópa 2005 – upplýsingasamfélag fyrir alla“ og á fundi sínum í Sevilla 21. og 22. júní 2002 samþykkti leiðtoga ráðið heildarmarkmið aðgerðaáætlunarinnar.

- 4) Framkvæmdastjórnin birti 22. janúar 2001 orðsendingu til Evrópuþingsins, ráðsins, efnahags- og félagsmálanefndar Evrópu og svæðanefndarinnar og ber hún yfirskriftina: „Mótun öruggara upplýsingasamfélags með bættu öryggi upplýsingagrunnvirkja og baráttu gegn tölvutengdum afbrotum“.

- 5) Í niðurstöðum fundar leiðtogaráðsins í Stokkhólmi 23. og 24. mars 2001 var mælt til þess að ráðið ásamt framkvæmdastjórninni þróaði heildstæða áætlun um öryggi rafrænna neta, þ.m.t. raunhæf framkvæmdaáætlun. Orðsendingin um: „Net- og upplýsingaöryggi: tillaga að Evrópustefnu“ frá 6. júní 2001 var fyrsta svar framkvæmdastjórnarinnar við þessum tilmælum.

- 6) Í ályktun ráðsins frá 30. maí 2001 um aðgerðaáætlun um rafræna Evrópu: upplýsinga- og netöryggi, ályktun ráðsins frá 28. janúar 2002 um sameiginlega nálgun og sértækar aðgerðir á sviði net- og upplýsingaöryggis ⁽⁵⁾, ályktun ráðsins frá 18. febrúar 2003 um evrópska nálgun á net- og upplýsingaöryggismenningu ⁽⁶⁾ og ályktun Evrópuþingsins frá 22. október 2002 um net- og upplýsingaöryggi: tillaga að Evrópustefnu voru aðildarríkin hvött til þess að grípa til sértækra aðgerða til að bæta öryggi rafrænna samskiptaneta og upplýsingakerfa. Evrópuþingið og ráðið fögnuðu enn fremur þeim fyrirætlunum framkvæmdastjórnarinnar um að þróa m.a. áætlun um traustari og öruggari rekstur Netgrunnvirkja og að semja tillögu um framtíðarskipulag net- og upplýsingaöryggismála á evrópskum vettvangi.

⁽¹⁾ Stjtið. EB C 291 E, 26.11.2002, bls. 243.

⁽²⁾ Stjtið. ESB C 61, 14.3.2003, bls. 184.

⁽³⁾ Stjtið. ESB C 128, 29.5.2003, bls. 19.

⁽⁴⁾ Álit Evrópuþingsins frá 12. febrúar 2003 (hefur enn ekki verið birt í Stjórnartíðindum ESB), sameiginleg afstaða ráðsins frá 26. maí 2003 (Stjtið. ESB C 159 E, 8.7.2003, bls. 11) og ákvörðun Evrópuþingsins frá 25. september 2003 (hefur enn ekki verið birt í Stjórnartíðindum ESB). Ákvörðun ráðsins frá 27. október 2003.

⁽⁵⁾ Stjtið. EB C 43, 16.2.2002, bls. 2.

⁽⁶⁾ Stjtið. ESB C 48, 28.2.2003, bls. 1.

- 7) Í aðgerðaáætluninni um rafræna Evrópu 2005, sem er staðfest að þessu leyti með ályktun ráðsins frá 18. febrúar 2003, er m.a. lagt til að komið verði á framtíðarskipulagi net- og upplýsingaöryggismála á evrópskum vettvangi.
- 8) Á grundvelli nýrra tegunda efnahagslegra, pólitískra og félagslegra tengsla getur aðlögun að upplýsingasamfélaginu hjálpað Evrópusambandinu að takast á við viðfangsefni þessarar aldar og stuðlað að vexti, samkeppnishæfni og atvinnusköpun. Upplýsingasamfélagið breytir smám saman eðli atvinnustarfsemi og félagsmála og hefur mikilvæg gagnkvæm áhrif þvert á svið sem fram að þessu hafa verið óháð hvert öðru. Nauðsynlegar ráðstafanir til að koma því í framkvæmd verða að taka mið af efnahagslegri og félagslegri samheldni Bandalagsins, þeirri áhættu sem fylgir því að standa utan við stafræna þróun og skilvirkri starfsemi innri markaðarins. Aðgerðir Evrópusambandsins og aðildarríkjanna í tengslum við upplýsingasamfélagið eiga að stuðla enn frekar að því að illa settir hópar taki þátt í upplýsingasamfélaginu.
- 9) Þörf er á fyrirkomulagi við eftirlit og miðlun reynslu sem gerir aðildarríkjunum kleift að bera saman og greina árangur og endurmeta framvinduna í tengslum við aðgerðaáætlunina um rafræna Evrópu 2005.
- 10) Setning viðmiðana gerir aðildarríkjunum kleift að meta hvort innlent frumkvæði, sem þau hafa tekið innan ramma aðgerðaáætlunarinnar um rafræna Evrópu 2005, hefur borið árangur sem er hliðstæður árangri bæði í öðrum aðildarríkjum og á alþjóðavísu og hvort tæknimöguleikar eru nýttir til fulls.
- 11) Enn fremur er hægt að styðja aðgerðir af hálfu aðildarríkjanna innan ramma aðgerðaáætlunarinnar um rafræna Evrópu 2005 með miðlun góðra starfsvenja. Evrópskur virðisauki, sem næst með setningu viðmiðana og góðum starfsvenjum, felur í sér samanburðarmat á árangri af mismunandi ákvörðunum, og er árangurinn mældur með sameiginlegum eftirlits- og greiningaraðferðum.
- 12) Nauðsynlegt er að greina efnahagslegar og samfélagslegar afleiðingar upplýsingasamfélagsins með það fyrir augum að auðvelda umfjöllun um stefnumál. Það gerir aðildarríkjunum kleift að nýta betur efnahags- og atvinnumöguleikana í tækniþróuninni, einkum á sviði upplýsingasamfélagsins.
- 13) Net- og upplýsingaöryggi er orðið nauðsynleg forsenda frekari þróunar öruggs viðskiptaumhverfis. Vegna þess hve net- og upplýsingaöryggi er flókið í eðli sínu skulu staðaryfirvöld, innlend yfirvöld og, eftir því sem við á, evrópsk yfirvöld, þegar þau gera ráðstafanir varðandi stefnumótun á þessu sviði, taka tillit til margháttaðra pólitískra, efnahagslegra, skipulagslegra og tæknilegra þátta og hafa í huga sjálfstætt og alþjóðlegt eðli samskiptaneta. Verði fyrirhuguðu framtíðarskipulagi net- og upplýsingaöryggismála á evrópskum vettvangi komið á verða aðildarríkin og Bandalagið betur undir það búin að bregðast við alvarlegum net- og upplýsingaöryggisvanda. Undirbúningsvinna verður að hefjast árið 2003.
- 14) Framangreind starfsemi er með því markmiði að stuðla að samvirkni og samvinnu milli aðildarríkjanna, landa Evrópska efnahagssvæðisins, landa sem hafa sótt um aðild að Evrópusambandinu og umsóknarlanda auk samstarfsríkjanna í Mið- og Austur-Evrópu og því getur framkvæmdastjórnin hvatt til þess í framtíðinni að þessi lönd taki meiri þátt í starfsemi áætlunarinnar.
- 15) Í þessari ákvörðun er mælt fyrir um fjárhagsramma sem gildir meðan áætlunin varir og er helsta viðmiðun fjárveitingavaldsins við árlega fjárlagagerð í skilningi 33. liðar samstarfssamnings frá 6. maí 1999 milli stofnana Evrópuþingsins, ráðsins og framkvæmdastjórnarinnar um eftirlit með fjárlögum og endurbætur á afgreiðslu fjárlaga.
- 16) Samþykkja ber nauðsynlegar ráðstafanir til framkvæmdar þessari ákvörðun í samræmi við ákvörðun ráðsins 1999/468/EB frá 28. júní 1999 um reglur um meðferð framkvæmdavalds sem framkvæmdastjórninni er falið⁽¹⁾.
- 17) Stöðugt skal fylgjast með framvindu þessarar áætlunar.

SAMÞYKKT ÁKVÖRDUN ÞESSA:

I. gr.

Áætlun til margra ára (2003 til 2005) um eftirlit með aðgerðaáætluninni um rafræna Evrópu 2005, miðlun góðra starfsvenja og aukið net- og upplýsingaöryggi (hér á eftir nefnd „áætlunin“ er hér með samþykkt.

Markmiðin með áætluninni eru eftirfarandi:

- a) að fylgjast með árangri aðildarríkjanna og innan þeirra og bera hann saman við það sem best gerist í heiminum með því að nota opinberar hagtolur ef hægt er,
- b) að styðja viðleitni aðildarríkjanna innan ramma aðgerðaáætlunarinnar um rafræna Evrópu 2005 á innlendum, svæðisbundnum eða staðbundnum vettvangi með greiningu á góðum starfsvenjum varðandi rafræna Evrópu og frekara samspili í þróun fyrirkomulags á miðlun reynslu,
- c) að greina efnahagslegar og félagslegar afleiðingar upplýsingasamfélagsins með það fyrir augum að auðvelda umfjöllun um stefnumál, einkum að því er varðar samkeppnishæfni atvinnulífsins og samheldni og einnig að því er varðar félagslega aðlögun; að veita stýrihópi rafrænnar Evrópu nauðsynlegar upplýsingar til að hann geti skorið úr um hentuga starfsstefnu aðgerðaáætlunarinnar um rafræna Evrópu 2005,

(¹) Stjtið. EB L 184, 17.7.1999, bls. 23.

d) að undirbúa uppsetningu framtíðarskipulags net- og upplýsingaöryggismála á evrópskum vettvangi, sem gert er ráð fyrir í ályktun ráðsins frá 28. janúar 2002 og aðgerðaáætlun um rafræna Evrópu 2005, með það fyrir augum að bæta net- og upplýsingaöryggi.

Sú starfsemi sem fellur undir áætlunina skal ganga þvert á atvinnugreinar og styðja þannig við aðgerðir Bandalagsins á öðrum sviðum. Engin þessara aðgerða skal vera endurtekning á þeirri vinnu sem er unnin á þessum sviðum samkvæmt öðrum áætlunum Bandalagsins. Aðgerðir, sem gripið er til samkvæmt áætluninni og varða setningu viðmiðana, góðar starfsvenjur og samræmda stefnu, skulu miða að því að ná markmiðum aðgerðaáætlunarinnar um rafræna Evrópu 2005, að efla net- og upplýsingaöryggi og breiðband og efla rafræna stjórnsýslu, rafræn viðskipti, rafræna heilbrigðisþjónustu og rafrænt nám.

Áætlunin skal enn fremur vera sameiginlegur rammi fyrir frekara samspil mismunandi innlendra, svæðisbundinna og staðbundinna vettvanga á evrópskum vettvangi.

2. gr.

Til að ná markmiðunum, sem um getur í 1. gr., skal ráðist í eftirfarandi flokk aðgerða:

a) Aðgerð 1

Eftirlit með og samanburður á árangri:

— af söfnun og greiningu gagna á grundvelli viðmiðunarvísa um setningu viðmiðana, sem skilgreindir eru í ályktun ráðsins frá 18. febrúar 2003 um framkvæmd aðgerðaáætlunar um rafræna Evrópu 2005⁽¹⁾, þ.m.t. svæðisbundnir efnahagsvísar eftir því sem við á. Einkum ber að leggja áherslu á gögn er varða helstu markmið aðgerðaáætlunarinnar um rafræna Evrópu 2005,

b) Aðgerð 2

Miðlun góðra starfsvenja:

— athuganir í þeim tilgangi að grafast fyrir um góðar starfsvenjur á innlendum, svæðisbundnum og staðbundnum vettvangi og stuðla þannig að árangursríkri framkvæmd aðgerðaáætlunarinnar um rafræna Evrópu 2005,

— stuðningur við markvissar ráðstefnur, málstofur eða vinnufundi til stuðnings markmiðum aðgerðaáætlunarinnar um rafræna Evrópu 2005 í þeim tilgangi að efla samvinnu og miðla reynslu og góðum starfsvenjum innan sameiginlegs ramma fyrir frekara samspil sem er skilgreint í b-lið 1. gr.,

c) Aðgerð 3

Greining og skipulagsumfjöllun:

— styðja starf félagsfræðinga og hagfræðinga með það fyrir augum að útvega framkvæmdastjórninni og, samkvæmt beiðni, stýrihópi rafrænnar Evrópu tilföng fyrir greiningu á framtíðarstefnu,

— styðja stýrihóp rafrænnar Evrópu til að veita skipulega yfirsýn yfir framkvæmd aðgerðaáætlunarinnar um rafræna Evrópu 2005, útvega vettvang fyrir

miðlun reynslu og gera snemmtækna þátttöku um-sóknarlanda mögulega og, eftir því sem við á, hvetja aðra hagsmunaaðila til þess að láta álit sitt í ljós,

d) Aðgerð 4

Aukið net- og upplýsingaöryggi:

— undirbúningur fyrir uppsetningu framtíðarskipulags net- og upplýsingaöryggismála á evrópskum vettvangi, sem gert er ráð fyrir í ályktunum ráðsins frá 28. janúar 2002 og frá 18. febrúar 2003 um evrópska nálgun á net- og upplýsingaöryggismenningu og í aðgerðaáætluninni um rafræna Evrópu 2005, m.a. með því að fjármagna kannanir, athuganir, vinnufundi um málefni á borð við öryggistilhögun og rekstrarsamhæfi þar að lútandi, áreiðanleika og vernd netsins, háþróað dulmál, friðhelgi einkalífs og öryggi í þráðlausum samskiptum.

3. gr.

Til að ná þeim markmiðum, sem eru sett fram í 1. gr., og koma til framkvæmda þeim aðgerðum, sem eru settar fram í 2. gr., skal framkvæmdastjórnin nota viðeigandi úrræði, einkum:

— gerð samninga um framkvæmd verkefna sem tengjast könnunum, rannsóknunum, nákvæmum rannsóknum á sértækum sviðum og sýniverkefni, sem eru takmörkuð að umfangi, þ.m.t. vinnufundir og ráðstefnur,

— söfnun, birtingu og dreifingu upplýsinga og þróun þjónustu á Netinu,

— stuðning við fundi sérfræðinga, ráðstefnur og málstofur.

4. gr.

Áætlunin skal taka til tímabilsins frá 1. janúar 2003 til 31. desember 2005.

Fjárhagsrammi fyrir framkvæmd þessarar áætlunar skal hér með vera 21 milljónir evra.

Leiðbeinandi sundurliðun er að finna í viðaukanum.

Árlegar fjárveitingar skulu háðar samþykki fjárveitingavaldsins og rúmast innan ramma fjárhagsáætlunarinnar.

5. gr.

Framkvæmdastjórnin ber ábyrgð á framkvæmd áætlunarinnar og samræmingu hennar við aðrar áætlanir Bandalagsins. Ár hvert skal framkvæmdastjórnin semja vinnuáætlun á grundvelli þessarar ákvörðunar.

Framkvæmdastjórnin skal taka ákvörðun í samræmi við málsmeðferðina sem um getur í 2. mgr. 6. gr.:

a) um samþykkt vinnuáætlunarinnar, þ.m.t. öll sundurliðun fjárveitingarinnar,

⁽¹⁾ Stjtið. ESB C 48, 28.2.2003, bls. 2.

- b) um samþykkt ráðstafana vegna mats á áætluninni,
- c) um setningu viðmiðana þegar leitað er eftir tillögum, í samræmi við markmiðin sem gerð er grein fyrir í 1. gr. og við mat á verkefnum, sem tillaga er gerð um að undangenginni slíkri leit, þegar fjárframlag Bandalagsins af áætluðu framlagi Bandalagsins er jafnt og, eða hærra en, 250 000 evrur.

6. gr.

1. Framkvæmdastjórnin skal njóta aðstoðar nefndar (hér á eftir kölluð „nefndin“).
2. Þegar vísað er til þessarar málsgreinar gilda ákvæði 4. og 7. gr. ákvörðunar 1999/468/EB með hliðsjón af ákvæðum 8. gr. hennar.

Fresturinn, sem mælt er fyrir um í 3. mgr. 4. gr. ákvörðunar 1999/468/EB, skal vera þrjú mánuðir.

3. Nefndin setur sér starfsreglur.

7. gr.

1. Til að tryggja að aðstoð framkvæmdastjórnarinnar sé vel nýtt skal framkvæmdastjórnin sjá til þess að aðgerðir í samræmi við þessa ákvörðun séu metnar fyrirfram, að fylgst sé með þeim og þær metnar eftir á.
2. Meðan aðgerðir standa yfir og að þeim loknum ber framkvæmdastjórninni að meta með hvaða hætti þær hafa farið fram og hvaða áhrif þær hafa haft og komast þannig að raun um hvort upphaflegu markmiðunum hefur verið náð.
3. Framkvæmdastjórnin skal upplýsa nefndina og stýrihóp rafrænnar Evrópu reglulega um framvindu við framkvæmd áætlunarinnar í heild sinni.

4. Við lok áætlunarinnar skal framkvæmdastjórnin leggja fyrir Evrópuþingið, ráðið og efnahags- og félagsmálanefndina matskýrslu um þann árangur sem náðst hefur við framkvæmd aðgerðanna sem um getur í 2. mgr.

8. gr.

1. Heimilt er að opna áætlunina fyrir löndum Evrópska efnahagssvæðisins, löndum sem hafa sótt um aðild að Evrópusambandinu og umsóknarlöndum auk samstarfsríkja í Mið- og Austur-Evrópu, innan ramma þeirra samninga sem hvert og eitt þeirra hefur gert við Evrópubandalagið.

2. Jafnhliða framkvæmd þessarar ákvörðunar er hvatt til samstarfs við lönd utan Bandalagsins og alþjóðasamtök eða -stofnanir eftir því sem við á.

9. gr.

Ákvörðun þessi öðlast gildi daginn eftir að hún birtist í *Stjórnartíðindum Evrópusambandsins*.

10. gr.

Ákvörðun þessari er beint til aðildarríkjanna.

Gjört í Brussel 17. nóvember 2003.

Fyrir hönd Evrópuþingsins,

P. COX

forseti.

Fyrir hönd ráðsins,

G. ALEMANNO

forseti.

VIÐAUKI

Áætlun til margra ára um eftirlit með rafrænni Evrópu, miðlun góðra starfsvenja og aukið net- og upplýsingaöryggi (MODINIS)

Leiðbeinandi sundurliðun á kostnaði 2003 til 2005

Hlutfall af heildarfjárhagsáætlun eftir flokki og ári				
	2003	2004	2005	Samtals 2003-2005
Aðgerð 1 — eftirlit með og samanburður á árangri	12%	14%	14%	40%
Aðgerð 2 — miðlun góðra starfsvenja	8%	10%	12%	30%
Aðgerð 3 — greining og skipulagsumfjöllun	2%	3%	3%	8%
Aðgerð 3 — aukið net- og upplýsingaöryggis	17%	5%	0%	22%
Hlutfall af heildarfjárhagsáætlun	39%	32%	29%	100%